

LALAMBE MIGODANA TALATAVOLONONDRY

Potika ny tanimbary sy tanimbolin'ny mponina

Tokantrano tantsaha miisa 150 ao amin'ny kaominina Talatavolonondry distrikan'Antananarivo Avaradrano, lalovan'ilay lalambe migodana kasaina hatao hampitohy an'Antananarivo sy Toamasina, no velon-taraina amin'izao fotoana, satria potika ny tanimbary sy ny tanimbolin'izy ireo amin'ny hanaovana izany lalambe migodana izany. Tany am-boalohany dia voalaza fa tampon-tanety no handalovan'ilay lalambe migodana hoy ireo tantsaha tompon-tany, ankehitriny anefa dia tanimbary sy tanimboly no potehana handalovan'izany,



Ireo tantsaha tompon-tany velon-taraina any amin'ny kaominina Talatavolonondry.

ka velon-taraina izy ireo satria fotoam-pambolena izao nefa potehana ny taninay, ka inona no hohaninay amin'ny taona ho avy raha izao no hitohy hoy izy ireo. Nambaran'ny filoha Rajoelina ihany

koa, fa hisy ny fanonerana ny tanin'ireo tantsaha lalovan'ny lalambe, tsy mbola misy izany vola izany hatramin'izao, ary mbola tsy nisy ny fifampiresahana mahakasika izany, hoy ihany ny tarai-

nan'ireto tantsaha ireto. Araka izany, misy fanaovana tsinontsinona ny mponina ao anatin'ny ho fanaovana ity lalambe migodana ity.

Stefa

Homamiadan'ny nono

Mpikaroka Malagasy nahavita fitaovana ahafahana mitsirika azy

Nisy mpikaroka Malagasy nahavita fitaovana, ahafahana mitsirika ny homamiada, na ny cancer ny nono amin'ny vehivavy. Namorona sonde optique manana endrika stylo, ny Dr Rasata Ravelo Andriamparany, ahafahana mizaha sy mitsirika, ny selan'ny homamiadana ao anatin'ny vatan'ny olona mararin'ny homamiadan'ny nono. Nantsoiny hoe maso fahatelon'ny mpandidy izy ity ary hanampy betsaka ireo mpit-

sabo, amin'ny fahafantarana dieny mialoha, ny fisian'ny homamiadan'ny nono, amin'ireo andriambavilanitra. Tao anatin'ny 8 taona no nanaovany fikarohana tany Europe, momba izay homamiadan'ny nono, ka nahazoany ity vokatra ity. Mendrika ny hahazo ny loka Nobel momba ny fahasalamana, ny voka-pikarohana misongadina toy izao.



Stefa

Ilay fitaovam-pitsirihana ny homamiadan'ny nono.

Matsiatra Ambony sy Fianarantsoa

Manana solofo mpandimby ny antoko TIM

Naneho hevitra mahakasika ny raharaham-pirenena sy ny fiainan'ny antoko TIM any Matsiatra Ambony, sy any Fianarantsoa, ny filoha leftra nasionalin'ity antoko ity any amin'ny faritanin'i Fianarantsoa teo aloha, Dr Rasolofenomanana Elysée, na Dr Elysée Zanabahoaka. Nambaran'ny fandalana mahazo aina ny antoko TIM amin'ny faritra Matsiatra Ambony sy amin'ny faritanin'i Fianarantsoa teo aloha. Porofon'izany hoy ny hetsika nandraon'ny TIM tany Fianarantsoa, ny tanora no tena maro an'isa nana-trika an'izany ary mpianatry ny Oniversite avokoa ny ankamaroan'izy ireo. Ny antony hoy Dr Elysée Zanabahoaka, mahatsapa ny tsy maha tafavoaka ny fitondrana amin'izao fotoana izy ireo, ka manatevina ny antoko TIM, izay antoko anisan'ny antoko manana ny maha izy azy eto amin'ny firenena amin'izao fotoana. Tsy ho tafavoaka anefa ny firenena hoy izy, raha tsy haverina hitondra firenena indray ny filoha Ravalomanana, satria iarahana-nahita fa be ny zava-bita miantraika



Dr Rasolofenomanana Elysée, na Dr Elysée Zanabahoaka.

amin'ny fiainam-bahaoaka nandritra ny fitondrany, hita porofon'ny fampirantiana nandritra ny fankalazana ny faha-20 taonan'ny antoko TIM teto amin'ny renivohitry ny faritra Matsiatra Ambony izany. Nanana sy manana ny anjara toerany lehibe amin'izany ny tanora, izahay koa tanora nanomboka nitantana ny antoko, tamin'izany nahavita fora zaza maimaimpoana niisa 1500, nialoha ny fifidianana tamin'ny taona 2018. Izao dia hita sy tsapa fa manana solofo mpandimby, na relève ny antoko, ny olana anefa tamin'izany fifidianana izany dia tratra ny tsindry ny olom-

boatendry, ka nisy ny halabato, teto Fianarantsoa ohatra, misy ny porofon'ny amin'ny hala-bato izay, noho ny famoahana biletà tokana. Ka ny ezaka ataon'ny antoko amin'izao dia ny iadiana amin'ny hisian'ny fifidianana madio sy mangarahara, satria tsy hisy fampandrosoana raha tsy misy fahamarinana. Ny fahamarinana tsy misy no tsy mahatafavoaka ny fitondrana Rajoelina amin'izao fotoana, hoy ihany Dr Elysée Zanabahoaka. Ary ny FFKM dia efa nilaza an'izany koa: tsy hisy fampandrosoana raha tsy misy fahamarinana. Ny zavatra ataon'ny antoko aty amin'

ny faritra amin'izay: ny fisoratana anarana amin'ny lisi-pifidianana ary ny fanaraha-maso hentitra an'izany, hanentana ny olona hifidy koa izahay amin'ny fifidianana ho avy. Hama-fisiko ihany, fa matanjaka ny antoko najoron'ny filoha Ravalomanana amin'izao fotoana, tsy vitsy ireo antoko teto vao niala teo amin'ny fitondrana ny mpitarika azy dia maty na nitsilopilopy ny antoko, toy ny PSD tamin'ny filoha Philibert Tsiranana, ny Arema tamin'ny filoha Ratsiraka, toy izany koa ny UNDD ny filoha Zafy Albert. Ny antoko TIM anefa hatramin'izao, mbola manana ny maha-izy azy foana ny TIM, na efa 13 taona aza tsy teo amin'ny fitondrana. Ary izahay amin'izao fotoana, mbola manetsika sy mamelo-maso, manao redynamisation ny fototra sy ny antoko amin'ny ankapobeny hatrany. Miroboro-boko tokoa ny antoko aty amin'izao fotoana, satria adinon'ny fitondrana Rajoelina ny aty amin'ny faritra izay nifidy azy, fa toa variana amin'Antananarivo izy ireo.

Isambilo

Centre « La bonté Madagascar »

Raikitra ny « Journée récréative »

Ny sabotsy 10 sy ny alahady 11 desambra teo, no natanterahan'ny avy eo anivon'ny Centre la bonté Madagascar ny « Journée récréative » teny amin'ny foiben-toeran'izy ireo Andraisoro (Faran'ny fiantsonan'ny zotra 141).

Raha tsiahivina, ivon-toerana iray naorin'ny Dokotera Ramanandrafaliarisoa Florienne, izay misahana ny fiahiana ireo zokiolona ara-batana, ara-tsaina ary ara-pahany ny Centre « La bonté Madagascar ». Natao ny « Journée récréative », hoy izy mba hahafahana mam-pahafantatra bebe kokoa ny sehatrasan'ny Centre la bonté Madagascar ary koa hitadiavana mpiara-miasa tsara sitrapo, afaka manabe voho sy mampiroborobo ny asa goavana sy masina iantsorohan'ny foibe. Amin'izao ankatoky ny fetin'ny faran'ny taona sy ny Asaramanitra izao ihany koa dia mendrika hitsena ampifaliana sy anatin'ny haravoana toa ny olon-drehetra ireo zokiolona. Ireto farany izay tsikaritra, fa lasa anjorom-bala ihany eny anivon'ny fiarahamonina rehetra eny ankehitriny. Mampiavaka ny Centre la bonté Madagascar ny fananan'izy ireo mpiandraikitra nanaraka fiofanana feno manodidina ny tontolon'ny zokiolona ary ny fotodrafitrasa manaraka ny fenitra, ahafahana mampiantrano ireo zokiolona. Tsy mamihina ho azy samy irery ny fahaizana norantoviny tamin'ny alalan'ny fianarana nataony ny Dokotera Ramanandrafaliarisoa, fa miezaka mizara izany amin'ny alalan'ny fanatontosana fiofanana. Manodidina ny 400 eo ho eo ankehitriny ireo olona efa nahavita fiofanana ary afaka misehatra avy hatrany amin'ny fikarakarana ireo zokiolona. Antso avo no atao ho an'ny eo anivon'ny Minisiteran'ny mponina sy ny fiahiana ara-tsosialy, mba hitondra ny anjara biriky manandrify azy, ho fampiroboroboana ny sehatrasan'ny Centre la bonté Madagascar, izay mahatsiaro tena ho miady irery ihany aloha hatreto amin'ny fanatanterahana ny asa masina ataon'izy ireo. Enga anie mba tsy ho antso an'efitra izany fa hisy hihaino ! Entanina, araka izany, ireo tsara sitrapo mahatsiaro fa tsy toy izao izy ireny raha tsy teo ireo zokiolona nanabe sy nanolokolo ary tsy nitandro hasasarana, mba handray anjara mavitrika ho amin'ity « Journée récréative » natao teny Andraisoro ity.

Lalaso Razafindrakoto



Ny mpitantana ny Centre La Bonté Madagasikara.

Taratasin'ny mpamaky

Fanehoan-kevitra ampitaina amin'ny gazety izao manaraka izao : mazava be ny sary fa tsy azo antoka ny fifidianana hoavy eo. Manara-baovao ny Malagasy. Mandeha ny resaka fa misy tsindry goavana ary fandrahonana any ambadika any ary mety ho very anjavony ny fitsipaham-pitokisana teny anivon'ny Antenimierampirenena. Koa raha ny Antenimierampirenena izay andrim-panjakana iray manana ny maha izy azy sy ny sonian'ny maroan'isa teny aza niala maina noho ny tsindry dia ho maika ve fa ny CENI sy ny HCC ? Ho avy indray koa ny tsindry dia hiova ny PV sy ny voka-pifidianana. Tsy hisy fahamarinany ny fifidianana ho avy eo TENA TSY AZO ANTOKA. Mila rafitra azo antoka sy hifanarahana miainga avy amin'ny dinika FIKAONANDOHAM-PIRENENA (concertation nationale) arak'izany ho vahaoalana. Tena ho loza io.

Mamonjy Ny Rina Mpamaky gazety Ny Valosoa, Toamasina